

Boy Ecury

Dia 23 di April ultimo e lo a cumpli 83 aña, pero el a fayece como un heroe cu solamente 22 aña. Ta trata di e arubiano balente Boy Ecury.

Su berdadero nomber tabata Segundo Jorge Adelberto Ecury. El a nace na Aruba na 1922 como e di 7 yiu den un famia grandi. El a bsihita St. Dominicus College y despues Juliana School.

Mescos cu su rumannan, Boy tambe a bai Hulanda pa studia. Di 1937 te 1939 e tabata alumno di Saint Louis Instituut Handelsopleiding na Oudenbosch. Despues el a sigui na Den Haag y a haya su praktijkdiploma Boekhouden na 1942.


Su mayornan a inscribi'e na Handelshogeschool na Tilburg caminda el a traha un tempo. Aki e tabata un di e dirigentenan di e forzanan secreto cu tabata bringa contra e alemanan nazi. Boy tabata usa un nomber secreto tambe, "Hubert Ernst".

Na juli 1944 Boy a haya e mandato y e mester a biaha di Delft pa Rotterdam. E tabata sa cu esaki tabata un mision cu peliger di morto. Pero Boy tabata pensa solamente riba su prohimo y con e por salbanan for di e garra di e nazinan.

Na september di e mesun aña, prome cu el a bai Rotterdam, el a pasa cerca su ruman muher (Mimi, q.e.p.d.), kende e tempo ey tabata biba na Voorburg, cerca di Den Haag. Aki el a laga un carta dirigi na su mayornan. Tabata algo manera un carta di despedida, pasobra Boy tabata sinti cu algo lo bai pas'e. Hasta el a expresa den su carta su deseo pa trece su restonan Aruba y pa der'e riba su isla natal, si acaso algo pas'e.

Diadomingo, 5 di november, el a bai misa mainta na Rotterdam. Biniendo cu algun amigo for di misa na pia y pasando bao un bentana unda tabata tin un hointa, el a tende bisa otronan paden: "Un ta Hubert Ernst boso ta busca? Ate aki!"

Y ey mes nan a par'e y arest'e. Nan a hib'e na un prison na Scheveningen cu tabta yama



"Oranjehotel". Ora nan tabata interoga Boy, nan a priminti'e cu si e menciona nomber di esnan cu e tabata yuda, nan lo lag'e bai Aruba bek sano y salbo. Pero Boy cu su caracter fuerte y firme den su mision a contesta: "Den cas di mi mayornan no tin lugar pa un traidor!"

E dia siguiente -- 6 di november 1944 -- na Waalsdorpervlakte, Scheveningen, e alemanan a fusil'e hunto cu dos amigo mas.

E famianan di Boy, tanto na Aruba como na Hulanda, a bin tende cu el a fayece, pero ningun hende por a bisanan unda e tabata dera.

Sinembargo e famia a ricibi cantidad di telegram y carta di condolencia, hasta uno personal di Su Mahestad Reina Wilhelmina.


Te dia 16 di januari 1947 su famia a haya un telegram bisando cu nan a haya e restonan y unda nan ta desea di der'e.

Dia 15 di April 1947 e restonan di Boy Ecury a yega Aruba y cu honor militar el a wordo dera den suelo arubano, manera tabata su deseo.

Dia 5 di november 1949 Gobernador di Antiyas a devela un busto na honor di Boy Ecury y a duna e plaza ey su nomber.

Ambos honor tabata pasobra Boy tabata un heroe arubiano, y cu mester keda bibo den memoria di nos pueblo y e generacion di futuro. E balor y curashi di Boy ta un ehempel pa e hubentud actual.

Un yiu di Aruba cu na edad hoben -- 22 aña -- a duna e cos mas precioso, su bida, pa nos por biba den un mundo liber!




ICH

Fotos y file: Archivo Historico Nacional
Entrevista cu Sra. P. Schouten-Ecury



Chabalito

Number 8 - Año VII - Afl. 2,=



BIBLIOTECA NACIONAL ARUBA



3 0993 00183 267 4